

DIVWER DI VACANCES

Quand li clotche dol rintréye dègnetéye,
C'èst po quî, mi prumêre pinséye?
C'è-st-à vos-ôtes di l'adviner
Dins tot ç' qui dj' va disfaufiler.

Come li tims m'a choné si télemint long
Di n' pus ètinde vosse vwès spèpî l' walon!
Mi keûr por vos, a son.né nét-èt djoû
En ratindant nosse bia raploû.
Dj'a sondjî qui ç' sèrè tos lès djoûs dicauce
Di rètinde vosse doûce èt syincieûse vwès qui cause.
Si v' saurîz come dj'a braî èt transi après vos,
Dimèré coyetaud èt n' pus jamais yèsse sossot.
Qui fyîz, vos, do tims qui dj' sètcheu su pids?
Veûy pus voltî qu' mi Qi Gong èt Taï Chi!
Dji sé bin qui dji n' sèrè jamais on maîsse,
Mins di d'ci l' momint qu'on m' mètrè dins l' caîsse,
Dji d'mèrrè l' padjot asgignî al tère,
Pindu à vos lèpes quand vos causeroz d' Feller...

“Fèrdom! S'èle li pôreut rovî po d' bon cit'la!
Po nos-ôtes tortos, c'è-st-on vraî sbaral!”

Qué boneûr di rentrer è scole al saîson dès pètchales!
Dji m' va r'vistrer mès-ouys dins vos nozèyès purnales,
Tchèssî l' mwaîje idéye di djouwer avou vos-aburtales.
Djè l' djure, dji n' frè pus pèter m' babèye come on osse-cu,
Po vos v'nu choûter, dji mètrè m' bia pète-au-cu.
Dji m' va studî l' bon walon come s'i s'reut one drogue,
Minme si po l' maîstri comufaut dj'atrape mi croque.
Po l' sicrîre sins fautes, dji m' vos va èvoyî dès bèlès lètes
Qui dj' sipritchoulerè avou do sint-bon al violète.
Po l' causer al lècion, dji m' va mète dès p'tits cayaus è m' bouche
Èt vos dîre dès bias doûs powinmes wou ç' qui dj' vos lomerè ...Minouche.

Dji m' taî asteûre! On m' va prinde po on lètche-botes,
Pinsèr qui dj'a por vos on tèrîbe côp d' cote...
Adon qui dj' faî jusse li blanke panse, en aparence,
Po-z-awè dès bons pwints èt-z-è fé bone ûsance.
Èt qui si dji n' vos-a nin tofêr di m' costé,
Dji pou bin r'ployî tos mès cayès èt-z-è raler.

Pierre Lazard